


371  
K 10



Early European Books, Copyright © 2011 ProQuest LLC.  
Images reproduced by courtesy of Koninklijke Bibliotheek, Den Haag.  
571 K 10








Early European Books, Copyright © 2011 ProQuest LLC.  
Images reproduced by courtesy of Koninklijke Bibliotheek, Den Haag.  
371 K 10





Early European Books, Copyright © 2011 ProQuest LLC.  
Images reproduced by courtesy of Koninklijke Bibliotheek, Den Haag.  
371 K 10



Early European Books, Copyright © 2011 ProQuest LLC.  
Images reproduced by courtesy of Koninklijke Bibliotheek, Den Haag.  
371 K 10








XIV. 6. 79




























TRACTATUS  
DE  
OFFICIO JUDICIS.

Authore  
JOAN. BOURICIO.

Harlingæ Frisiorum,  
Typis HERONIS GALAMA.  
c1o 1o c LXVIII.







TRACTATUS  
DE  
OFFICIO JUDICIS.

Et usu fori, in supremâ  
FRISIORUM Curiâ.

AUTHORE  
JOANNE BOURICIO, J. C.  
*Ejusdem Curiae* SENATORE.



Koninklijke  
Bibliotheek  
te 's-Grave

HARLINGÆ FRISIORUM,  
Typis HERONIS GALAMA. cId Idc LXVIII.



STATUTUS  
OFFICIO IUDICIS  
REPUBLICA  
TRIBUNAL  
AUTORE


LOANKE BOUNICIO  
IN  
ALORE



STATUTUS  
REPUBLICA



# P R Æ F A T I O.

 UI in vestigandis rerum mutationibus ac momentis operam suam atque industriam collocant, mirari sæpè solent, quonam fato eveniat, ut *justitiæ* ac *judiciorum* vigor, qui patrum memoriâ præclarus, atque ad invidem vetustatis consummatus extitit, nunc contrà, quasi senescente sæculo, & prodigiosè effæto, adeò torpeat ac flaccescat, ut metuendum videatur, ne, quemadmodum beatâ & sæcundâ illustrium virorum superioris memoriæ fæturâ, ad perfectionem suam pervenit, ita nunc, deficientibus in-

\*

3

ju-



P R Æ F A T I O.

juriâ temporum literarum vindicibus, planè tandem concidat, ac contabescat. Causas hujus rei (uti solet in exaggerandis sæculi sui malis ingeniosa esse posteritas) alij alias assignant: multi nutantis universi defectum, & ruituræ potentiae deliquia sibi fingunt, ut, cum nihil in hac mundi scænâ stabile uspiam, aut perpetuum sit, ipsa *natura*, quasi sterilis, totque ceu partibus lassata, multum nativi spiritus ac vigoris, mortalium ingeniis detrahat, atque absumat; Alij, non ingeniorum, sed ævi, quod vivimus, culpam interpretantur, cum spretis atque in exilium pulsis, honestis artibus, non vir-



P R Æ F A T I O.

virtutis aut eruditionis commen-  
datione iudices creari, sed gra-  
tiâ & sordibus, ancillante fastu,  
& impudentiâ, ad sanctissimum  
judicandi munus protrudi, con-  
spexere; Plures ad socordiam, &  
publicam temporum calamitatem  
respiciunt, easdemque cum im-  
periis vices tribunalia subire vo-  
lunt, adeò, ut crescente poten-  
tiâ, vigorem suum exerant & su-  
blimitatem, vel inclinante, deliqui-  
um promittant, aut ruinam. In-  
de factum videmus, ut, quoties  
*Resp.* alibi ortas & auctas, alibi  
fractas & concussas legimus, ejus-  
dem quoque fideris afflatu, *justi-*  
*tiam*, five vegetatam & florentem,  
five



P R A E F A T I O.

five depressam & obsoletam cer-  
namus: Nimirum, ita sciscente in  
tabulis fatorum supremo rerum  
moderatore Deo. *Qui ibi solet consi-  
lia corrumpere, ubi fortunam constituit mu-  
tare.* Testis est Romana Resp. ter-  
rarum olim, ac gentium Dea;  
quæ, ut poëtae verbis utar,

*Subdidit oceanum sceptris, & margine cæli  
Clausit opes, quantum distant à Tygride Gades,  
Inter se Tanais quantum Nilusque relinquunt.*

postquam illa à priscâ majorum  
virtute descivit, & lubricinosum  
decemvirum dominatum admisit,  
justitiæ quoque repudium misit,  
resque suas sibi habere jussit.

*Tunc rupti fasces precio, sectorque favoris,  
Ipse sui populus, lethalisque ambitus urbi,  
Annua venali fecit certamina campo.*

Se-



## P R Æ F A T I O

— *Senibus quoque libera virtus  
Excidit, sparsisque opibus subversa potestas.*

Ubi verò rursus oculos attollere,  
& libertatem profiteri cœpit, re-  
lictis anterioris, & planè barbari  
sæculi exuvijs, justitiam, ceu im-  
periorum cotem, ad usum digni-  
tatemque pristinam, quasi post li-  
minio, reduxit; tantoque studio  
& curâ eam excoluit, ut nihil in  
togâ aut sago, foro aut lustro, ci-  
vitate aut censu, religione aut co-  
mitio, totâ denique hominum so-  
cietate, ordinè agi, peragi, pan-  
gi aut expediri posse existimaret,  
nisi I<sup>ctus</sup>, isque divini & humani  
juris peritissimus, sapientissimo suo  
consilio, ceu oraculo, illud com-  
probasset:

\* \*

*Sic*



P R Æ F A T I O.

*Sic prætextato jam tum Cicerone vigente,  
Laurea facundis cessèrunt arma togatis.*

Quod si tanta quoque hodiè, divini Numinis clementiâ, juris prudentiæ esset dignitas, profectò sermo noster in justissimas querelas diffundi non cogeretur; quis enim corruptam fori integritatem non doleat? Quis mimum & *Atellanas* illas, quas tanto supercilio ibidem agi videmus, non damnet ac detestetur? quis arbitraria judicum suffragia, subsellia potenti- bus obvia, miseris obsepta, calumnias, injurias, prævaricationes, totam denique *Remp. Judiciariam* tam insigniter deformatam non deploret? Quis turbæ isti pragmaticæ, quâ calet tribunal, ro-  
stra



P R Æ F A T I O.

stra personant, non succenseat,  
quæ rudes linguas clientibus suis  
elocat, ut mercenariâ loquacita-  
te, aliena patrimonia infami aucu-  
pio nundinetur? Nimirum, im-  
periis hæc debemus, ubi ad pra-  
xin huiusmodi homines quæstuarii  
admittuntur, qui nihil, præter im-  
pudentiam, in forum adferunt,  
neglectaque literaturâ cultiori, il-  
lotis quasi manibus, ad hæc sacra  
accedunt; Neque verò hoc ita  
quemquam interpretari velim,  
quasi omnes promiscuè *Iudices &*  
*Advocatos* perstringendos mihi du-  
xerim, agnosco enim libenter in  
quibusdam, solidam jurispruden-  
tiæ cognitionem, rerumque foren-  
sium



P R Æ F A T I O.

sium notitiam, sed de iis loquor,  
*qui lites serunt, ut ex alienâ sementi mes-*  
*sem suam faciant,* quos, quemad-  
modum vellem, uti foro excede-  
rent, ita nobis, qui in hac statio-  
ne sub supremo Imperatore DEO,  
stipendia facimus, seriò adniten-  
dum est, ut collapsa Iurispruden-  
tiæ dignitas restauretur: Ita DEUS  
OPT. MAX. *Areopagum Frisiæ nostræ,*  
quem palladium Reip. esse, illi vi-  
dent, qui bono publico non invi-  
dent, perennare, ac ad seram po-  
steritatem, antiquis viris & virtu-  
tibus auctum, transmitti patiatur.

DE



D E

## OFFICIO JUDICIS.

C A P. I.

*De Etymologiâ Judicis, & variis ejusdem appellationib.*

**A**B Etymologiâ vocabuli, cum bono DEO, hoc opus auspicamur, quod in omni ferè disciplinâ factitandum suadet U L P I A N U S in l. 1. ff. de Inst. & Iure. Dicitur autem judex à jure dicundo, quod est judicare cum jurisdictione: idque judicibus ordinariis, sive qui circulum habent, propriè competit, l. 1. ff. de Jurisd. cæteri secundum præscriptam sibi formulam tantum cognoscunt, & delegata negotia latâ sententiâ terminant, ideòque in l. unicâ C. ne quis in suâ causâ judicet vel jus dicat, judicare & jus dicere per particulam disjunctivam discernuntur. Esse nomen honoris, abundè testatur Imperator in l. 2. C. de vet. jure enucleando, ubi, quos hîc illustres, gloriosos, & excellentissimos nuncupat, eos alibi legum custodes, ac justitiæ vertices appellat, imo ipse gentium doctor PAULUS, eos ministros DEI in bonum pronuntiat, armatos gla-

A  
dio

judex verben  
derivationem ?  
judicis est



dio justitiæ, ad coërcendos facinorosos, adde, quod in sacro codice benedicto servatori nostro JESU CHRISTO, officium judicis frequenter attribuatur, undè sublimitas nominis dignosci facilè potest.

## CAP. I I.

*De Definitione Judicis, sive  
ejus descriptione.*

*Definitio Judicis:*

**A**B Etymologiâ vocis, ad ipsam definitionem transgredimur. Est autem judex vir bonus, juris & æquitatis statuendæ peritus, ad judicandum secundum leges & consuetudines rationabiles, publicâ authoritate donatus. Cui definitioni congruit ea descriptio, quam ponit Iustinianus *in principio tit. institut. de Officio Judicis*, quod sit persona à DEO ordinata, ad judicandum, pro ut legibus, moribus & constitutionibus proditum est. ex quo apparet, ab hac primariâ dignitate procul habendos esse, quos scelus vitæ, seu morum infamia à bonorum cœtu segregat, *l. 2. C. de dignit.* quibus meritò annumerandi sunt, qui per fædas nundinationes, per sordes & ambitum, ad hoc honoris fastigium promoveri satagunt, *l. fin. C. ad l. Iuliam. Repet.* Scabinis item alphabeticis, noctis & ignorantiaæ alumnis, hæc honoris porta patere non debet: non enim affectandum est illud, in quo quis intelligit, vel intelligere debet, imperitiam suam alii fore peri-  
cu-



culosam, l. 7. & 8. ff. ad l. Aquil. Itaque manum, quod ajunt, de tabulâ, ne fortassis occinat ipsis infauſta illa vox, quæ *Servio* Prætori à *Mucio Quinto* olim fuit objecta, TURPE EST PATRICIO ET NOBILI, CAUSAS ORANTI, JUS IN QUO VERSATUR, IGNORARE, l. 2. §. 43. ff. de orig. juris. Remum ducat qui didicit, ſic emenſo importuſo judiciorum æquore, ad æternæ tranquillitatis portum appellere tandem dabitur, ubi perpetua rerum malacia, atque ab omni tempeſtatum nube longè poſita ſunt alcedonia.

## C A P. I I I.

*De Officio ſeu vitâ Judicis morali.*

**Q**Uemadmodum in omni homine Chriſtiano, ita etiam in judice duo potiffimum requiruntur, quorum primum ac præcipuum eſt, ut recte de Deo ſentiat, alterum, ut honeſtè ac decenter vivat, nihil enim eſt quod clariore lumine præfulget, quàm recta fides in judice, nihil eſt quod ab insolenti motu, & pravis actionibus æquè illum continet, quàm ſi in ardore fidei, in devotione mentis, in integro religionis ſtudio, inconcuſſâ animi conſtantiâ decurrat, certè, vera religio cultores ſuos in ſublime provectos, tenerâ ſollicitudine conſervat, nec parva iis à clementiâ divinâ viciffitudo tribuitur, qui in determinandis cau-



sis, non humanæ sapientiæ bilance, sed religiosæ pietatis trutinâ, non politicæ subtilitatis staterâ, sed Theologicæ sinceritatis æquilibrium, consilia sua metiuntur. Deinde operam dabit iudex, ut præcepta juris, quæ profitetur, continuo observet, ut honestè vivat, neminem malo exemplo offendat, non luxu diffluat, non otio torpeat, sed vitæ integritate, & morum innocentia aliis prælucescat, perpetim memor istius CLAUDIANI:

*Tunc observantior æqui  
Fit populus, nec ferre vetat, cum viderit ipsum  
Authorem parere sibi.*

Nec vero illicium facilè reperias, quo efficacius plerunque homines trahuntur, quàm rationem honesti in iudice, cujus gradibus, etiam dum in terris agit, in cælum videtur ascendere: Idcirco ipsi,

*Non tam quid liceat, quàm quid fecisse decebit,  
Occurrat, mentemque domet respectus honesti.*

Nam quæ facta lædunt pietatem, existimationem, verecundiam nostram, &, ut generaliter dixerim, quæ contrà bonos mores fiunt, ea nec nos facere posse credendum est, inquit justitiæ verè custos, rigidusque satelles *Papinianus in l. 1. ff. de cond. & instit.* Ad hæc comis & affabilis, admixtâ quadam gravitatis temperie, sit oportet, adeò ut severitati hilaritas, gravitati simplicitas, majestati humanitas nihil detrahat, & ambiguum relinquat, venerari magis, an diligere mereatur:

*Sit torva voluptas  
Frontis, & angustæ majestas grata pudoris.*

Ip-



## IUDICIS.

§

Ipsa corporis figura, plena iustitiæ, gravitatem spiraret, comitatisque ac majestatis imaginem quandam repræsentet, ut terribilis delinquentibus, mansuetus placidis ac devotus censeatur. *Nov. 17. cap. 5. §. 3.* severus sit, non sævus; austerus cum lepore ac sale, non ferus aut ferreus.

### C A P. I V.

## *De Officio Judicis in genere circa lites.*

**P**Ræmissis iis, quæ omnes omninò homines concernunt, instituti nostri ordo postulat, ut de *Officio Judicis* generali in terminandis litibus, paucis disseramus. Ante omnia verò judex considerabit, **DEUM OPT. MAX.** constituisse reges, principes, magistratus, dedisse leges ac jura, ut dissidenti populo jus reddant, causasque ex æquo definiant; Priusquam autem judicium accipitur, judex litigantium animos, propositis maximis multiplicibusque litium incommodis, ad compositionem inflectere conabitur, negotiosas esse lites objiciet, periclitari amicitiam, & dilectionem mutuam divelli, tranquillitatemque animi perturbari, seriò enarrabit. quibus omnibus deterriti, si partes à lite decesserint, expedita res est: sin verò post habitâ tam salutari dehortatione, experiundum sibi duxerint, causæ merita diligenter expendet, ad



indagandam veritatem cuncta rimabitur, tandemque rationibus probè subductis, controversiam sententiâ suâ dirimet: Ut autem commodè eo perveniat, omnes privatos affectus exuere, & ante aram justitiæ deponere debet; quâ de re memorabile extat *SC<sup>um</sup> apud Ratisbonenses*, tabulæ marmoreæ his verbis insculptum: *Quisquis Senator Officii causâ Curiam ingrederis, ante hoc ostium omnes privatos affectus abjicito, iram, invidiam, vim, odium, amicitiam, adulationem, Reip., personam & curas tuas subjecito, nam ut alius æquus aut iniquus fureis, ita quoque DEI iudicium subibis & sustinebis*. Quo laudabili effato, omnes qui de rebus dubiis consultant, propius monentur, ut integris animis, & ab omni perturbatione liberis ad tribunal accedant, & æquè querelas pauperum, quàm spes ac vota divitum excipiant, ut omnibus & singulis æqui sint & censeantur. Pulchrè *IC<sup>us</sup> Marcianus in l. II. ff. de pænis*, PERSPICIENDUM EST (inquit) JUDICANTI, NE QUID DURIUS AUT REMISSIUS CONSTITUATUR, QUAM CAUSA DEPOSCIT, NEC ENIM SEVERITATIS AUT CLEMENTIÆ GLORIA AFFECTANDA EST; SED PERPENSO JUDICIO, PRO UT QUÆQUE RES POSTULAT, STATUENDUM: Avaritiam porro, ceu malorum fontem ac fomitem, ex animo detestabitur, non populi decumas, nec civium census turpi colludio diripiet, non in argenti pondere, sed in argumenti gravitate vota sua fundabit;

*Honestum præferet utili,  
Recusans alto dona nocentium vultu.*

*Sor-*



*Sordida non capiet iudex donaria, nec se  
Pollicitis flecti muneribusve sinet.*

Qui verò aliorum hæc trahunt, & iustitiam venalem circumferunt; ii meminerint, quòd æternis juxta ac temporalibus pænis obnoxios sese reddant: *Væ*, inquit JEHOVA, qui justificatis impium pro muneribus, & iustitiam iusti aufertis ab ipso. Et alibi, Principes populi in muneribus judicabant, sacerdotes ejus in mercede docèbant, & prophetae ejus in pecuniâ divinabant, propter hoc Sion quasi ager arabitur, & Ierusalem quasi acervus lapidum erit; Iure civili variæ itidem in hanc rem pænæ constitutæ sunt, *Si*

*QUIS*, ait Marcellus, in l. i. ff. ad l. Iuliam. repet.

PECUNIAS IN MAGISTRATU, POTESTATE, CURATIONE, LEGATIONE, VEL QUO ALIO OFFICIO, MUNERE, MINISTERIOVE PUBLICO ACCEPERIT, TESTIMONIUM PUBLICE DICERE, AUT JUDEX ESSE, POSTULAREVE PROHIBETUR, & in *Auth. novo jure C. de pænâ judicis qui malè jud.* Imperator sancivit, ut ab eo qui accepit, vel promissionem suscepit, si causa pecuniaria sit, dati triplum, promissi duplum exigatur, dignitate ceu cingulo amisso: Si verò causa sit criminalis, confiscatis omnibus bonis in exilium mittatur. Sed his nequidquam obstantibus, iustitiam nonnunquam vendi, & veritatem tenebroso cavillatoriae argumentationis colore fuscari, nemò facile iverit inficias. *Aurum* (inquit author quispiam) in nonnullis tribunalibus præsidet, & velut Imperator quidam pragmaticæ sanctionis edicta promulgat, *Aurum* latet in occulto, & sententiam depromit in publico,

co,



co, in sudario angusto concluditur, & decisis negotiis  
judiciales calculos apponit: saepe quos causa condem-  
nat, mendax pecunia justificat, quos autem conscien-  
tia liberat, improba moneta damnat, nummus nempe  
momenta legibus tribuit, atque ad suum intellectum  
obscuras sententias, falsus interpretator, inflectit,  
nummus interdum cor judicum circa divites emollit,  
circa pauperes ad exercendum rigorem impellit, &  
ut canit CACHERANUS:

*Munera justitiæ libram moderantur, & ipsum  
Munera jus statuunt, destituuntque simul.*

Et HORATIUS,

*Æs laquei pretium!*

Propterea Thebani simulachra judicum sine manibus  
& oculis effigiabant, quibus innuebatur, justitiæ  
donis & alloquiis non esse subjectam: quocirca judi-  
ces qui causas audiunt, justè judicent, & tanquam  
sacerdotes justitiæ, purissimum ejus cultum subditis  
suis proponant ac propinent, ne incidant in poenas su-  
prà relatas, & ne fortè, dum acquirunt pecuniam,  
perdant animam, nemò enim habet injustum lucrum,  
sine justo damno, *lucrum in arcâ, damnum in animâ*.

Veritatem quoque studiosè sectabitur, & totis vi-  
ribus insequetur, donec eam assequatur; quoniam ve-  
rò in arduo est ejus exploratio, judicem oportet  
esse sagacem, sapientiâ & eruditione conspicuum, ut  
fictas hominum insidias & calliditates dissipare,

*Et mersum possit latebris educere verum.*

Quas præcipuè qualitates in judice agnoscens *Iethro*,  
consultuit *Mosi*, ut seligeret de omni plebe viros sa-  
pien-



pientes, timentes DEUM, & veraces, idque denotabat inscriptio *Urim & Thummim*, hoc est lumen & perfectionum, in pectorali summi sacerdotis; quod & *Aegypti* intenderunt, qui unum iudicii praesidem constituebant; is signum aureâ catenâ, variis ornatum gemmis, à collo suspensum gestabat, cum epigraphe, *Monile Veritatis Iudicialis*. quia veritas ritè agnita, ad perfectionem ducit, dubiosque iudicum animos in iudicio firmat ac informat, ut discernere possint.

*Vera quid à falsis, quid ab umbris lumina distent.*

## C A P. V.

*De Jurejurando Iudicum.*

PRiscis legis-latorum constitutionibus cautum est, omnes omninò iudices ac Romani juris disceptatores, non aliter litium primordium accipere, nisi praestito prius, pro more, jure jurando, se iudicatos secundum leges, idque jure Codicis comprobatum est. *l. 14. C. de judiciis*. cæterum, ab hoc jure postea nonnihil recessum esse videtur, nam *Irnerius*, *Authenticarum compiler* minus authenticus, putavit, iudices hodiè tantum promittere, se ex animi sui sententiâ jus dicturos, exceptis defensoribus civitatum; undè nonnulli interpretes colligunt, majoribus magistratibus remissum esse hoc jus jurandum: sed hallucinantur, *Irnerius* enim perperam authenticam, iis conceptam verbis, ex *Nov. 8.* desumpsit,

B

quo-



quoniam in eâ magistratibus præscribitur observantia æquitatis, quæ nihil aliud est, quàm obedientia legum, quarum vis ac potestas in æquitate consistit, idque etiam ex constitutione Nov. 82. c. 1. planum fit. Quæ verò solemnitas circà hoc jusjurandum observanda sit, apparet ex d. l. 14. nimirum evangelia, quæ illic sacro-sanctæ scripturæ nuncupantur, antè sedem judicalem deponi solita fuisse, iisque religiosè à judice tactis, corporaliter jusjurandum præstitum: Sed hæc solennitas hodiè non perindè obtinet, & pro cujusque principis aut magistratus præscripto, aliter atque aliter usurpatur. In tribunalibus fæderati Belgii, elevatis duobus prioribus dextræ manus digitis, hoc ferè modo enuntiatur; Iuro, me secundum jus Romanum, & Statuta Reip. jus dicturum, ita mihi propitius sit omnipotens DEUS.

*Solemnitas jusjurandi: v. condi. et jur. Civili:*

*Quænam solemnitas jusjurandi: v. condi. apud Belgas?*

## C A P. V I.

*De in jus vocando.*

**E** Dictum de in jus vocando, est basis ac fundamentum omnis judicii, idcirco circumspecti judicis est, prospicere, ne quid hac in parte peccetur, alioqui, quod ajunt, in portu naufragium facturus; hodiè verò jussu judicis, per citationem expediri solet, quâ monetur adversarius, ut se sistat coram eo, qui jus dicturus est; desideratur autem in delegato, ut tenorem suæ delegationis citationi inferat, & generaliter in omni judice, ut nomina partium exprimat,

*Quænam requirantur citatis sit valida?*



mat, causam addat, locumque, diem, ac terminum  
 iudicii designet, & præcipuè, ne extrà limites juris-  
 dictionis citationem emittat, gnarus, extrà territori-  
 um jus dicenti, impunè non pareri, *l. fin. ff. de ju-  
 risd.* quo casu Curia nostra solet rescribere, *Nihil  
 hic.* Hoc ita, nisi lite jam cum extraneo contestatâ,  
 citatio fiat per literas requisitoriales, cui si non pa-  
 reatur, bonus iudex variè disponet. Deinde non  
 sunt vocandi, qui vocari prohibentur, quales enu-  
 merantur in *l. 2. ff. de in jus vocando*; uti nec infan-  
 tes, impuberes, furiosi, aut prodigi, sed eorum  
 tutores & curatores, aut, si iis destituantur, proxi-  
 mi ex consanguineis, ut curatores constituent, vel,  
 si id negligant, iudex ipse dispiciet *l. 1. & 2. ff. qui  
 petant tutores.* Puberes, si non habeant curatores,  
 citandi sunt, ut legitimè compareant, & curatorem  
 eligant, quod si refragentur, multâ indictâ cogen-  
 di sunt, vel ipsis etiam invitis dabitur, *l. 6. C. Qui  
 petant tut. vel curat.* Parentes quoque absque præ-  
 viâ prætoris veniâ citari nequeunt, *l. 3. & 4. ff. de  
 in jus vocando.* Illa verò citatio, quæ publicè per  
 campanam aut tubam, vel per edictum & affixionem  
 literarum fit, non facilè est concedenda, & ab or-  
 dinario tantum iudice, sive eo qui vice principis  
 fungitur, decerni solet, ideòque sola Curia eam im-  
 pertit, hâc ferè formulâ; *Fiat citatio per edictum,  
 periculo petentis*; ut postea integrum sit, propius de  
 eâ cognoscere. Habet autem locum, si singula uni-  
 versitatis membra citanda sint, si adversarius impe-  
 diat, quo minus citatio ipsi insinuetur, si locus non  
 sit tutus, si creditores sint incerti, & si citandus sit

*Quid si puberis vo-  
 cantibus?*

*Citatio quæ publicè  
 per campanam & per  
 edictum & affixionem li-  
 terarum fit, quibus  
 libet gaudet locum?*



vagabundus, nusquam fixum habens domicilium;  
*l. 4. §. 6. ff. de damno infecto. l. 8. ff. Ad SC<sup>um</sup>. Trebel.  
 l. 6. C. de remiss. pig. Bart. in l. 2. C. de annali except.*  
 In calce citationis relatio nuncij conscribi solet, ut  
 de ejusdem legitimâ expeditione judici constare pos-  
 sit, cui relationi plena fides adhibetur, propter ele-  
 ctam industriam personæ, & juramenti religionem,  
 quâ judicio obstrictus est, *l. 5. §. 13. ff. de rebus eorum  
 qui sub curâ sunt, sine decreto non alien.* Quod si reus  
 propter absentiam bis de contumaciâ fuerit accusatus,  
 actor à commissario ad Rotulam implorat veniam offe-  
 rendi libelli, (*intendit vulgò vocant*) quam impetrat,  
 observato in omnibus stylo & ordinatione Curix, quo-  
 ritè instructo, reus declaratur contumax, & ab omni-  
 bus defensionibus sibi competentibus removetur, &  
 condemnatur in petitionem actoris, si ea in continen-  
 ti probetur, sin minus, fit interlocutio in factis: In-  
 terdum etiam in civilibus arrestum decernitur, quod  
 debitori arrestantis est insinuandum, eique dies di-  
 cendus, quo compareat, allegaturus justam arresti re-  
 laxandi causam, si autem in morâ sit, judex ex pecu-  
 niâ arrestatâ solutionem imperabit; debitores quoque  
 suspecti de fugâ, vel copiam sui facere detrectantes,  
 auctoritate judicis detineri possunt, qui rursus di-  
 mittuntur sub duplici cautione, judicio sisti, & judi-  
 catum solvi, teste Clariss. D. IOANNE à SANDE,  
*lib. 1. Decis. tit. 17. defin. 1. & 2.* In criminalibus  
 præviâ inquisitione fiduciariâ, rei in carcerem impin-  
 guntur, si crimen sit atrox, & corporalem pœnam  
 mereatur, *l. 1. ff. De custodia & exhib. reorum*, sin  
 minus, Quæstor causarum criminalium reis dicam  
 scri-

*De libello quem vul-  
 go intendit vocant:*

*De Arresto:*



scribit, ut determinato tempore in foro juridico, si-  
 ve loco iudicii adsint, quibus præsentibus (bis enim  
 citati & absentes carceri mancipantur) contendit, eos  
 in custodiam mittendos, atque ex carcere & vinculis  
 causam defendendam esse; hic processus, ad dupli-  
 cam ritè instructus, senatui videndus traditur, qui  
 à carcere & custodiâ accusatos plerumque absolvit,  
 datis fidejussoribus, se vocatos, sub pænâ confessi  
 & convicti, confestim adfore; si verò crimen inten-  
tatum sit capitale, & reus fugâ sibi consuluerit, edicto  
evocatur, ut compareat & se purget, quod, si non  
fecerit, dimidia capitis redemptio, hoc est centum &  
quingenta carolini aurei ex ipsius bonis fisco appli-  
cantur, juxtâ ordinationem Frisîæ, enchiridio statu-  
torum insertam, quæ, licet tantum loquatur de ho-  
micidâ fugitivo, idem tamen in aliis quoque facinoro-  
sis, statuendum sentio; quæ enim conveniunt in iden-  
titate rationis non sunt separanda in constitutione juris:  
si verò intrâ annum reversi, ab accusatione se purga-  
verint, aut mortui sint, indictam mulctam recipient,  
 juxtâ. l. 1. & 2. C. de requirendis reis.

## C A P. V I I.

*De videndo ante interlocu-  
toriam processu.*

**D**E citatione legitimè decernendâ, proximè mo-  
 nuimus, nunc de videndo antè interlocutoriam

B 3

pro-



processu, & singulis ejusdem partibus, nonnulla dicemus; Inprimis autem judex inquiret, an partium advocati veste nuptiali, hoc est, legitimo mandato sint muniti, juxta formam l. 65. ff. de procurat. alioqui talis processus retrò redderetur nullus, & sententia de super lata, foret irrita; deinde libellum actoris, formam litis intentatæ continentem, diligenter examinabit, an causam justam ac honestam complectatur, an congrua sit conclusio, & propositæ actioni conveniens, an sit inepta, incerta, vel obscura, nam ex vitioso libello, & ineptâ conclusione, actor nihil obtinebit, imò judex talem libellum ex officio rejicere potest, & debet, teste Baldo ad l. fin. C. de annali except. secus erit, si in fine conclusionis hæc clausula adjecta sit, *petit actor omni meliori modo ac viâ, jus ac justitiam sibi administrari*; ea enim operatur, ut judex solam rei gestæ veritatem, quæ ex processu elicitur, non petitionem actoris respicere debeat; Ita sentiunt communiter Doctores, *Iason ad l. 24. C. de pactis, & alii diversis locis*; IACOBUS BOURICIUS, *avus meus, in tractat. de Officio Advocati, cap. VIII.* ratio est, quia actor per hanc clausulam judicem videtur interpellare, ut officium suum nobile impertiri velit: Quemadmodum autem libellus omni vitio carere debet, ita etiam responsio rei debet esse clara, certa & perspicua, litiscontestationem aptis & apertis verbis inducens, articulisque unum tantum factum completentibus, distincta, similiter actoris replicatio, & ultiores partium scripturæ, debent esse breves & succinctæ, non diffusæ, variisque rerum & verborum circumstantiis involutæ, ne nimia prolixitate judici  
te-



tenebras offundant; quibus ita dispositis, & processu ad conclusionem perducto, judex diligenter investigabit, an rite instructus sit, & ex authenticis scripturis per amanuentes descriptus, an omnia requisita statuto Frisæ, & ordinatione Curia comprehensa, adhibita sint, quo facto, si quæstio in jure consistat, litem definitivâ sententiâ terminabit, sin minus, partes ad probandum admittet, præfixo ipsis bimestri spatio; nisi sit causa criminalis vel matrimonialis, in quibus fit interlocutio, *in factis in formâ, in causa Criminali & Matrimoniali fit interlocutio in factis in formâ:* quia in iis plerumque de vitâ & existimatione liberi hominis, adeoque de re magni ponderis ac momenti agitur. Aliquandò etiam ante primam interlocutoriam Curia nostra articulos probatorios partibus exhibet (poincten van Officie vocantur) ad evitandos circuitus, & ut norint, quæ facta ad justificationem causæ probanda sint.

## C A P. V I I I.

*De juramento calumniæ, positionibus, & articulis probatoriis.*

Quandoquidem sæpe usu venire solet, ut jurjurandi religione, contentiosa litigantium instantia compescatur, ideò receptum est, judices non aliter causas audire posse, quam exacto à personis litigan-



gantibus jurejurando propter calumniam, quo actor profiteatur, se non calumniandi animo, sed fiduciâ bonæ causæ litem adversario suo intendisse, & reus vicissim declaret, quod putans se bonâ instantiâ uti, ad reluctandum pervenerit, idque adeò necessarium est, ut ejus omissio vitiet processum, l. 2. §. 4. C. de jure jur. propter calumniam dando, & quamvis partes hoc sacramentum sibi invicem remittere velint, (quod nonnunquam accidisse scio) tamen judex illud ex officio exigere debet, ut ita lites non solum, verum etiam calumniatores minuantur, & Deum pro hominibus in omnibus causis judicem esse patefiat. Pæna recusantis, in actore est dispendium litis, in reo, ut habeatur pro confessio l. 38. D. de jurejurando. An autem hoc jusjurandum per procuratorem præstari possit? juris est non usquequaque explorati; multi magni nominis Theologi & Iurisconsulti istum jurandi modum improbant, quos citat Clariss. D. IOANNES à SANDE, libro I. Decis. tit. 9. Defin. 1. propter cauteriatis quorundam conscientias; qui jurisjurandi religionem non venerantur, cum per alios jurant: cæterum hodiè in tribunalibus ubique ferè invaluit; Rectius tamen illud expediri dixerim, si mandatarius ad hoc speciale habeat mandatum, cum expressione causæ, & recensione capitulorum, quæ vera, aut falsa esse existimet, quæ sententia, licet usu fori, & stylo Curix nostræ non obtineat, nihilominus tamen magnam habet rationem, quia mandans magis erit sollicitus de perjurio vitando, si non perfunctoriè tantum, sed ex certâ scientiâ in animam suam jurari postulet: Hoc juramento utrimque à partibus præstito, articulos

*Jusjurandum Calumnia  
Deo non facit, et qd  
Omissio non vitiat processum*

*Quamvis pœna recusantis  
his qd jusjurandum?*



los principales, additionales & super additionales (ulteriorer vix admittuntur) recipiet, & in responsionibus colligendis providebit, ut respondens purè per verbum credit, aut non credit, ad positiones respondeat, maximè, cum de proprio suo facto interrogatur, & si articuli sint obscuri aut captiosi, monebit rudes, ac doli nescios, de vero sensu ac sententiâ verborum, ne per inconsideratam confessionem (error enim non nisi stante iudicio corrigi potest) damnum aliquod sibi accersant; quod si fecerit, conscientiam D E O, hominibus fidem probabit.

## C A P. I X.

*De Testibus examinandis.*

I N examinatione testium, in quâ nonnunquam cardo totius quæstionis consistit, iudex procurabit, ut omnia bono ordine conficiantur: Itaque primum testes legitimè vocabit, eosque seriò & cordatè monebit, ne quid contrà veritatem, vel propriam conscientiam deponant, *alioqui divinas juxtà ac humanas penas luituri*, ne pecuniâ muneribusque corrupti, ad dicendum testimonium accedant, nec ullo modo adduci se patiantur, ut quicquam committant, quod cum integritate hominis Christiani, cum præscripto legum, ac recepto Curix stylo pugnat; Silentium quoque ipsis commendabit antè iurjurandum præstitum, ut testimonium suum clam aliis habeant, ne labefactetur veritas, & fides testium enervetur.

C

Te-



Testes vocati, si iuramentum declinent, indicta multa cogi, imò in custodiam mitti possunt, si præfractè obliuant, l. 3. in fine ff. De Tab. exh. si verò propter ignorantiam iurare recusent, propius monendi sunt, si propter religionem, ut Anabaptistæ, nequaquam excusandi, quia iuramentum religiosè præstitum, calumniarum iniquitates plenius coercere solet, adde, quod ferendi non sint, qui specioso simplicitatis velo veritatem abscondere, & ordinem iudiciorum intervertere satagunt. Excipiuntur nonnulli, qui recensentur in l. 4. & 8. ff. de Testibus. putà, senes septuagenarii, valetudinarii, milites, &c. qui, ut testimonium inviti non perhibent, ita iuramentum præstare non coguntur.

*Quamvis inviti testimo-  
nium perhibere non co-  
gantur.*

De Iudæis hoc obiter notandum, quod tantum in causis Iudæorum admittantur, imposita decalogo dextrâ, pronuntiantes hæc verba:

*Non assumes nomen Domini in vanum.*

Deinde secretò testes audiet, ne sese mutuò instruant, & ex composito testimonium per colludium perhibeant, exemplo senum Evangelicorum, SUSANNAM stuprare conantium, qui falsò eam commissi adulterii accusantes, à DANIELE Prophetâ, repetitâ seorsim quæstione, mendacii convicti, pænas temeritatis suæ luerunt. Testes quoque interrogabit de ipsorum ætate, de qualitate, statu, & domicilio, quem interrogandi modum eleganter proponit Callistratus in l. 3. ff. de Testibus. Ut iudex propius definire possit, quousque probandæ cuique rei sufficiant: Et generaliter;

*Quamvis obstricta iudi-  
ci in Testibus examinandi.*

*Dum testes recipit iudex, hæc cuncta notabit,*

*Au-*



*Auditus, Visus, Persona; Scientia, Causa,  
Fama, Locus, Tempus certum, Responsio certa.*

Singuli enim per sensum corporeum rationem dicti sui reddere tenentur *l. 2. ff. de Testibus.* & de rebus sibi cognitis perspicuè veritatem dicere, *l. 18. ff. eodem.* Ideò pars adversa contrà quam producantur, interrogatoria plerunque proponit super circumstantiis ipsius negotii, & qualitate personarum, ut ad vacillationem, vel contrarietatem inducantur, *Maranta, parte sextâ de interrog. product. num. 2.* Formanda autem sunt ex ipsis articulis, *Gail. observ. 95. num. 5. lib. 1.* Et si superflua, impertinentia, aut captiosa sint, ea iudex ex officio amputabit, *Albericus de Malet, in Tractatu de Testibus cap. 18. num. 10.*

An autem interrogatoria parti articulos producenti communicanda sint? variant interpretes; multi id expedire putant, inter quos *Schurff. consilio 86. numero 2. cent. 2.* Ut pars contrà quam, confestim iudici possit demonstrare, quæ impertinentia, aut captiosa esse existimet; Ceterum contrarium est verius, iudex enim publicando interrogatoria, dat ansam instruendi & subornandi testes, ut ex composito ad ea respondeant, atque ita falsitas deprehendi nequeat, *Ita post Hostiensem & alios, tradit Pacianus, de Prob. cap. 65. num. 112. lib. 1.* Itaque satius fore arbitror, si partes post didicita testimonia, de admit- tendis vel rejiciendis interrogatoriis, coram iudice experiantur. Interdum statim post litem contestatam testes audiri possunt, puta, si sint senes, valetudinarii, peregrè profecturi, adeò ut commodè semper haberi nequeant, & generaliter, quoties evidens æqui-

*Interrogatoria quoniam modo formanda;*

*Responsio.*

*Resp.*



tas illud postulat; *Ne veritas occultetur, & probationis copia fortuitis casibus subtrahatur.* Ex iisdem ferè causis testes ad perpetuam rei memoriam ante litis contestationem examinari possunt, eandemque vim & efficaciam habent tales probationes, quam habent ordinariæ; secus in criminalibus, quia earum causarum exactior cognitio esse debet, *l. fin. C. de Prob. Spec. de Officio omnium iudicum §. postremo loco.* Actor, si huiusmodi testes producere velit, intrà annum agere debet, ne nimia procrastinatione lis fiat immortalis, Reus, propter incertitudinem movendæ sibi controversiæ, indistinctè eos sistere potest. *l. 4. ff. Ad. l. Aquiliam. Gail. lib. 1. observ. 92. num. 4. & 8.*

*Testes quoque die festis  
examinari possunt;*

Testes quoque die feriato examinari possunt, si necessitas hoc exigat.

*Quippe etiam festis quædam exercere diebus,  
Fas & jura sinunt.*

Et specialiter, propter causas his versibus expressas.

*Pax, scelus admissum, manumissio, res peritura,  
Terminus expirans, mora testis adesse nolentis;  
Hæc faciunt causas festis tractare diebus.*

Idem de producendis instrumentis, quod suprà de testibus dictum est, responderi potest; quibus & illud addi, quod instrumenta usque ad conclusionem in causâ recipiantur, factâ adversario potestate, ea refutandi, si velit; quod in Camerâ Impetiali non obtinere, refert Gayl. obs. 103. num. 15. lib. 1.

Testibus in hunc modum examinatis, tandem lapsa productionis termino, subsequitur conclusio in causâ, nisi aliquis partium eos velit reprobare, aut inducias



cias petere, ad super inducendos ad huc alios, quæ induciæ non aliter, quam causâ cognitâ, & refusis retardati processus expensis conceduntur, ideoque Curia nostra plerunque rescribit; *Fiat Request. in iudicio*, ut pars altera in contradictorio audiri possit. Si vero terminus peremptorius à iudice non sit præfinitus, quadrimestre partibus ad producendos, reprobandos, & salvandos testes præfigitur; quo elapso, Commissarius audientiæ juridicæ, omnem ulterioris probationis spem præscindit, & factâ interlocutione, os partibus claudit, salvo tamen mediocri temporis intervallo, quod pro re natâ longius, aut contractius præscribere potest. Et ita habet nostra praxis.

## C A P. X.

*De Oculari inspectione.*

**U** Sitatissimam in praxi ocularem esse inspectionem & potissimam probationis partem, testatur *IC<sup>ius</sup> Ulpianus in l. 8. §. fin. ff. fin. regund.* eaque decernitur, vel ad instantiam partis, & tunc regulariter in termino probatorio exercetur, vel fit ex officio iudicis, & sic antè litiscontestationem, ut in novi operis nuntiatione, in causâ damni infecti, vulneris ac ventris inspectionis, cum de imprægnatione aut virginitate dubiatur: vel (quandò periculum est in morâ) in quacunque parte iudicii, nonnunquam etiam post sententiam & in executione, ad informandum iudi-

C 3

cem,

*Qd: bñnam casibz ger-  
ocularis inspectio magis fa-  
q: entibus?*



cem, & generaliter habet locum, quoties judicium magis, quam testimonium requiritur *l. fin. §. fin. C. de jure Dom. impetr.* In exercitio autem hujus Commissionis inprimis Commissario observandum est, ut partes litigantes, & testes, si hoc necesse sit, in rem præsentem venire faciat, ut tenorem suæ Commissionis ipsis aperiat, & silentium severè injungat, ne visa & audita revelent, aut se mutuò informent; ut exactè omnia in scriptis redigat, agrorum ædiumque fines ritè demonstrari procuret, & ut totum hoc Commissionis negotium ordine ac decenter procedat, adeoque post habitis etiam exceptionibus & protestationibus, in actu pergat, tandemque causam integram & intactam, ad ordinarium judicem referat ac remittat, qui visis, lectis & perspectis processus partibus, sententiam ferre, absque inordinatâ dilatione tenebitur.

*Relatum Commissario  
Observanda :*

## CAP. XI.

*De Terminis Iudicis præfinito.*

**I**ure Digestorum annalis erat expediendæ litis terminus, quem postea Imperator Iustinianus ulterius extendit, causasque civiles triennio, criminales biennio decidendas præcepit *l. 13. C. de Iudiciis.* Movet dubium *lex fin. ff. de Feriis.* Ubi actori in civilibus una, in criminalibus duæ, reo tres dilationes conceduntur, adeoque criminalibus causis longius tempus præstitutum videtur, quam civilibus; Respondent interpretes, quod aliud sit, plures dilationes probatorias



rias dari, aliud totum iudicium magis protrahi; dicta *lex. 13.* loquitur de termino totius litis, lex finalis de dilationibus, adeoque de parte tantum iudicii; quæ planè diversa sunt. Quantumvis autem termino distent hæc duo iudicià, initio tamen conveniunt, utrumque enim à litis contestatione regulariter incipit *l. un. C. de Litiscont.* hinc, licet multi anni in præparatoriis iudicii exfluxerint, illi tamen in computatione huius termini non attenduntur: ita *Iason & Alex.* ad hanc legem. Cæterum exolevit hodie hoc *SC<sup>um</sup>*, nulumque in tribunalibus statum tempus dirimendis litibus præfixum est, & usu ferè receptum, ut causæ ad definitivam novissimè instructæ, proximè terminentur; idque iudex, si conscientiam suam fartam tectam, & ab omni sequiori suspicione liberam servare velit, sequi & observare debet.

## C A P. X I I.

*De Sententiâ Definitivâ.*

**P**ER sententiam definitivam res in iudicium deductæ finem accipiunt, & ad eam audiendam partes citandæ sunt, alioqui erit nulla *l. 7. C. Quomodo & quando iudex.* & si alterutra post conclusionem in causâ decesserit, idque ex judiciali allegatione iudici liqueat, hæres ejus citabitur, *Gayl. lib. 1. observ. 110. num. 3 & 4.* Quod in Camerâ Imperiali non observari, refert idem *auth. observ. 109. num. 3.* Sed sufficit, quod semel legitimè & peremptoriè ad audiendam cau-



causam vocentur. Consistit in condemnatione, vel absolutione, sive in totum, sive ex parte l. 3. & 4. ff. de re judicatâ. Ferenda est eo loco, quo more majorum jus solet reddi *l. pen. ff. de Iustitiâ & jure.* & sedente coram tribunali iudice, publicè pronuntiari debet, quod jure Canonico præcisè requiritur.

*Convenit ut sedeat iudex, nec ab ordine cedat, Cum pia pro Rostris jura daturus erit.*

Sententia semel lata retractari nequit, nisi per restitutionem aut revisionem, Curia enim nostra appellationem non admittit, exemplo Præfecti Prætorio, l. unicâ C. de sententiis Præfecti Prætorio. Restitutioni non est locus, nisi ex falsis testimoniis aut instrumentis sententiam quis obtinuerit, aut evidens aliquis error in formâ aut materiâ ejusdem demonstrari possit; interim tamen executio sententiæ suspendi non debet. Nullitas quoque irritam eam reddit, puta, si à iudice incompetente, aut directò contrâ leges sit lata *l. 2. C. Quando provocare non est necesse.*

In judiciis singularibus, ut empti vendit. locat. conduct. mutui & similibus, certa quantitas exprimenda est, l. 3. C. de sententiâ quæ sine certâ quantitate profertur. In universalibus sufficit generalis adjudicatio, ut si ad reddendas rationes, ad restituendum gregem, vel hæreditatem agatur. In sententiis quæ pro eo quod interest proferuntur, iudex sequetur regulam præscriptam in l. unicâ C. de sentent. quæ pro eo quod interest proferuntur. & in adjudicandis fructibus & expensis *l. 3. C. de Fructibus & litium expensis, junctâ Nov. 82. c. 7.*

CAP.



## CAP. XIII.

*De Executione Rei judicatae.*

**L**ite per Definitivam finita, succedit legitima ejusdem executio, in quâ perficiendâ, Commissarius antè omnia, traditis sibi mandatis executorialibus, parti victæ denuntiabit, ut statuto tempore sese sistat, eique insinuabit, ut sententiæ, in quantum liquidæ, intrâ decendum satisfaciât, alias, intrâ idem spatium causas oppositionis exhibeat. (Quæ denuntiatio à practicis summatio appellatur) quod, si fecerit, lis suo marte decurret, & quant'ocius terminabitur, quia processus executivus est summarius, adeoque maturè expediendus, nisi judex vel delegatus, vi sententiæ ex officio procedere possit, ut, si victor in possessionem hæreditatis, vel prædij alicujus, aut ex carboniano edicto, venter, aut impubes in possessionem mittendus sit, l. 1. ff. de Ventre in possessionem mittendo.

Si verò in alieno territorio executio dirigenda est, judex ejus loci per literas requisitoriales, sive mutui compassus rogabitur, ut sententiam secundum formam suam & tenorem executioni mandet. l. 15. §. 1. ff. de re judic. & ibi Gothofredus in notis. Idque propter favorem justitiæ, ubique ferè in tribunalibus Belgii, in usu, & in viridi observantiâ est.

Exceptiones merita causæ concernentes, & quæ  
D
sen.



sententiam ipsam impugnant, uti, nullitatis, neglecti ordinis iudiciarii, &c. Iudex à quo, non ad quem examinabit; de iis autem, quæ post sententiam proponuntur, uti, solutione, compensatione, & similibus, iudex requisitus cognoscet, cessante interim iudicati executione, l. 1. ff. de re Iudic. Gayl. lib. primo observ. 113. num. 5. & sequentibus. Vide Oldendorpium, cap 59. de Except. D. Sandium, lib. primo, Decis. tit. 12. Defin. 5. & Doctores ibi citatos.

## C A P. X I V.

## De Revisione.

**B**eneficium Revisionis adversus sententiam Curia definitivam, implorari solet, si causa quingentos aureos excedat, eaque intra decendium opponenda est, quo subsecuto, sententia non aliter executioni mandabitur, quam si victrix pars dignam fidejussionem præbuerit, tantum restituendi cum legitimis augmentis, quantum fuerit in condemnatione, si judiciali retractatione sententia resolvatur, aut si fidejussorem invenire nequeat, juratoriae cautioni committitur; Remittitur enim interdum cautionis necessitas propter egestatem, ne, dum executoris pertinax & avara protervitas extraneos & idoneos fidejussores flagitat, multiplex innoxia paupertati incommodum infligatur, l. 33. §. 1. C. de Episc.

¶



& Cler. Idem quoque sentit Guido Papæ in *Decisionibus suis*.

Si verò hac formulâ supplicatio non porrigatur, executio causæ sine fideiussione procedet, reformationis jure illi servando, qui se gravatum putaverit, ut intrâ biennium Curix supplicare possit.

Actor, tempore introducendæ revisionis quinquaginta Carolinos monetæ Belgicæ, in judicio consignabit, in pænam Fisco applicandam, si sententia lata, justa, & legibus conformis habita fuerit; sed si alicubi in eâ erratum, peccatum, dormitatumve sit, pecunia sequestrata ei restituetur. Deinde causas gravaminum, & errores judicantium, vocatâ ad id parte adversâ, vivâ voce in foro juridico proponet, nullis insuper novis processui revisionis additis documentis, vide *Rebuff. de supplicat. sive errorum proposit.* Revisio utrimque semel duntaxat coram iisdem iudicibus intentari potest,

*l. 5. C. de prec. Imper. offer.* Quo sensu verum est, revisionem revisionis non dari; *Credebant enim veteres, eos qui ob singularem industriam, exploratâ eorum fide & gravitate, ad ejus officii magnitudinem adhibentur, non aliter pro sapientiâ ac luce dignitatis suæ judicaturos, quam secundum leges & constitutiones Populi Romani, l. 1. §. 1. ff. de Offic. præfect. prætor.* Secunda tamen revisio à principe peti potest, maxumè, si priores sententiæ non sint uniformes, Bart. in l. 1. C. ne liceat tertio provocare, glossa fin. in l. 1. ff. de Off. præf. prætor. ratio est, ne auxilium contrâ injuriam & incuriam iudicum de negetur; & ne contrâ jus subditos gravari princeps patia-



tiatur, arg. l. 1. ff. de appell. junctâ l. 1. ff. de Injuriis. Adde, quod per errores judicum bona injuste acquiri non debeant, l. 1. ff. de condict. ob turpem causam. Vide Anthon. Thesaurum, dec. 246. Dissentit Paulus Christin. decis. belg. vol. 1. cap. 12. Guido Papæ decis. 346. Rebuff. in tract. de supplic. quæst. 8. num. 48. Georgius de Cabedo, pract. observ. decis. 12. num. 27. & 29. In Frisiâ, sex judices prioribus adjunguntur, extranei tres, domestici totidem, qui causam ex integro audiunt, & collatis plurimorum votis, controversiam pronuntiatione suâ definiunt.

C A P. X V.

## *De Diplomatis moratoriis, Beneficio inventarii, & Cessionis bonorum.*

**D**iplomata moratoria, sive literæ quinquennales, debitoribus citrà culpam suam facultatibus lapsis, concedi solent, adhibitis solennitatibus de jure requisitis, vocatis, videlicet, omnibus creditoribus, & præstitâ sufficienti cautione, se finitis induciis æs alienum solutores; quo facto, hæ literæ intrâ mensem à die impetrationis in judicio exhibitæ, per interlocutionem Commissarii in audientiâ ju-



juridicâ intimantur : juxtâ placitum *Caroli Quinti* statutis nostris insertum.

Beneficium inventarii & cessionis bonorum, servatis quibusdam formulis, Curia nostra impertit, confecto, nimirum, inventario, datis fidejussoribus pro conservatione bonorum, & interposito jurejurando, nihil uspiam celatum, aut ex bonis hæreditariis subtractum ; *ut ita hæres damni securus, spem emolumenti retineat, & quicquid satisfactis creditoribus superest, sibi reservet. l. fin. C. de jure delib.*

Effectus diplomatis moratorii, & cessionis bonorum hic est, quod omnia currente quinquennio maneant in statu, horrida præconis & executoris vox fileat, & debitores in carcerem detrudi nequeant, *l. 1. C. de cess. bon.* & ubi ad pinguiorem fortunam pervenerint, non teneantur in solidum, sed in quantum facere possunt, *l. 6. & 7. ff. eodem.*

## C A P. X V I.

## De Officio Judicis in causis Criminalibus.

**H**Actenus de Officio Iudicis in causis civilibus, reliquum est, ut de ejusdem functione in criminalibus, paucis dispiciamus : In iis autem iudex cum industriâ & circumspectione quadam procedet, quia vitam & existimationem hominis concernunt,

D 3

Ita-



Itaque crimen diligenter investigabit, omnes circumstantias curiosè perpendet, nihilque intentatum relinquet, quo author criminis cognosci, & deprehendi queat, quæ diligens & accurata inquisitio cum emphasi & verborum pondere commendatur, *Deuteronomij, cap. 17. vers. 4. & seq.* CUM REPERTI FUERINT, INQUIT JEHOVA, APUD TE INTRA UNAM PORTARUM TUARUM, QUAS DOMINUS DEUS TUUS TIBI DATURUS EST, VIR AUT MULIER, QUI FACIAT MALUM IN CONPECTU DOMINI DEI TUI, ET TRANSGREDIANTUR PACTUM ILLIUS, UT VADANT, ET SERVIENT DIIS ALIENIS, ET ADORENT EOS, FACIENTES EA QUÆ NON PRÆCEPI, IDQUE TIBI FUERIT NUNTIATUM, AUDIENSQUE INQUISIVERIS ANXIE, ET VERUM ESSE REPERERIS, ET ABOMINATIO FACTA EST IN ISRAEL, EDUCES VIRUM ET MULIEREM, QUI REM SCERATISSIMAM PERPETRARUNT AD PORTAS CIVITATIS TUÆ, ET LAPIDIBUS OBRUENTUR: IN ORE DUORUM AUT TRIUM TESTIUM PERIBIT, QUI INTERFICIETUR; NEMO CONDEMNABITUR UNO DUNTAXAT CONTRA SE DICENTE TESTIMONIUM; MANUS TESTIVM CVM MANV POPVLI INTERFICIET EVM, VT AVTERAS MALVM DE MEDIO TVI.

Eamque methodum in requirendis & puniendis reis judicem sequi oportet, quod sanctus ille, & in omni patientiæ genere exercitatissimus *Iobus* fecisse se testatur, causas nempe, quas non norat, penitus indagasse, idque exempla *Pilati* & *Festi Præsidis*, abundè evincunt, *Iohan. cap. 18. vers. 29. & seq. Act. cap. 25. vers. 16. & 17.*

Si verò de crimine ejusque authore non usquequaque constet, sed reus variis præsumptionibus gravetur, & veritas aliter inveniri non possit nisi per tormenta, quæstionem habere licet; teste *I<sup>cto</sup>.*

*Mar-*



*Marciano in l. 9. ff. de quest. & si plura indicia violenta & indubitata concurrant, ea plenam probationem important, juxta sententiam Franc. Brun. in tractatu de judiciis, quest. 1. & Egidii Bossi in pract. criminal. tit. de Delict. num. 10. & 12. Doct. ad l. 5. §. 6. ff. de re Mil.* eamque in judicando Senatus noster sequitur, ut refert Clariss. Vir *Ioannes à Sande*, in *Decis. suis*, lib. 5. tit. 9. def. 14. ubi casum & decisionem singularem hac de re proponit. Similiter quoque non ita pridem à Curia nostra judicatum in causâ cujusdam homicidæ, *Hagâ-Comitis* transmissi, qui in publicâ viâ nullo alio præsente (quod erat in confesso) paganum quendam, cum ipso ambulanti, proditoriè trucidaverat.

Deinde reos ad defensiones suas admittet, & neminem indictâ causâ condemnabit:

*Dicet jus miseris, primumque exaudiet illos.*  
Non enim veritatis ratio patitur, quemquam indefensum damnari, *l. 3. C. de requir. Reis.* & lex divina neminem judicat, nisi prius ab ipso audierit, & cognoverit, quid faciat, *Ioh. cap. 7. ver. 51.*

Non semper in irrogandis pænis jus strictum sequetur, sed habitâ circumstantiarum ratione, asperitatem legum, æquitate quadam mitigabit; secedet aliquid ab acri justitiæ sole, non discedet, ignemque oleo non addet, sed in levioribus delictis ad lenitatem supplicij inclinabit, in gravioribus autem severitatem legum, cum quodam benignitatis temperamento subsequetur. *l. 11. ff. de pænis, l. 22. C. eodem.* Pulchrè quondam poëtæ *Herculis* clavam  
oleo



oleo madidam finxerunt, innuere volentes, actus justitiæ quandoque oleo misericordiæ esse temperandos.

In ferendâ sententiâ decretoriâ lentè festinabit, gnarus, præcipitantiam esse novercam justitiæ, & rarò celeres, nisi forsan in scelere, esse felices.

In voto constans erit, nam subita & inconsiderata voluntatis mutatio, levitatem & debilitatem judicii designat. Absit tamen pertinacia, bonorum consiliorum remora, non enim prudentis est, in errore progredi, sed propter utilitatem publicam eum emendare, & quando judex consilium suum in melius reformat, non se mutat, sed potius aptat, haud secus ac manus, quæ cum in palmam extenditur, & cum in pugnum adstringitur, semper eadem est: Propterea si primâ statim consultatione centrum veritatis non tetigerit, melioribus sententiis accedet, maximè, si quid supervenerit, quod statum quæstionis immutet; nam nemò sanus, mutationem consilij in melius, inconstantiam dixerit, inquit latialis eloquii torrens Cicero, lib. i. de Offic.

Post consultationem taciturnus, nihil enim magni sustinere potest, cui tacere grave est, ideòque consiliorum publicorum renuntiatores jure civili suspendio plectebantur, *l. 35. §. i. ff. de Penis.* Et *Aegyptij* illis linguas abscindebant, qui arcana senatus divulgaverant; Laudandus eo nomine *Cato*; qui publicè nec privatim ullum unquam verbum pronuntiasse dicitur, quod pronuntiatum doluit, Prædicanda Camerae Spirensis constitutio, quæ omnia in Senatu dicta, gesta, judicata, perpetuo silentio



tio involvi, & nihil injussu Cæsaris revelari voluit. Non tamen hoc axioma catholicum est & universale, sed suas patitur exceptiones, multa enim in ordine senatorio peraguntur, quæ utiliter dici & commemorari possunt, si ad religionis ampliandæ studium, morum reformationem, & reip. tranquillitatem pertineant: Accusandi igitur illi Blaterones & locutulei, qui instar vasis rimarum pleni, hac illac perfluunt, & deliberationes cum publicè tum privatim habitas, temerè produnt, & obviis quibuscunque communicant, maximè iis, quæ in sinu eorum dormiunt, teste *Michâ cap. 7. vers. 6.* Accusandi quoque ebriosi, qui inconsultâ temeritate,

*Arcanos produnt sensus, & operta recludunt.*

qui à legitimo judicij tramite deflectentes, fanda ac infanda pleno impetu despumant, adeoque verum esse illud *Salomonis* proverbium ostendunt, *Nihil ibi esse occultum, ubi regnat ebrietas.* Propterea veteres ebrietatem non solum odio persecuti sunt, sed etiam severè in ebriosos animadverterunt; Athenienses ex instituto solonis iudices temulentos morte mulctarunt, *Plato* ipsis vino interdixit, *Helvetij*, fortissimi illi libertatis suæ defensores, *Sæto* eos proscripserunt: Et huc spectant leges Romanorum, *Famia*, *Orchia*, *Cornelia*, *Ancia*, *Iulia*, aliæque. Exterminanda igitur provinciâ & civitatibus ebrietas est, vitiorum omnium vorago ac gurges, scelerum & flagitiorum omnium mater, æternæ damnationis origo, humanæ vitæ venenum, quæ *Lotho* incestum cum propriis filiabus suasit, *Phocam* Pho-

E

cio-



cionis filium, *Albidium* adolescentem, *Vintherum* Merfburgensem episcopum, *Michaëlem* orientis Imperatorem, & *Cleomenem* philosophum mente, *Holophernem*, *Andebundum* Anglorum regem, & *Alexandrum* magnum vitâ privavit, quæ *Cyrum* totius propemodum terrarum orbis monarcham, & *Hannibalem* fortissimum belli ducem, cum totâ militum manu funditus delevit, quæ *Trojam*,

*Quam neque Tydides, neque Larissæus Achilles,  
Non anni domuere decem, non mille carinæ,*

devicit, & in cineres favillasque redegit. Arcendi proculâ foro & tribunalibus ebriosi, qui tanquam sues in luto & cæno, in vino & frustis esculentis se volutant, qui fæctorem in ore, tremorem in corpore circumferunt, & quorum non solum consortium, sed etiam aspectum, omnes boni fugiunt & averfantur: itaque

*Cane pejus & angue,  
Syrenum cantus, & Circe pocula iudex,  
Vitabit damnosa bonus:*

ut iudiciorum angusta sedes, ebrietatis fæce ac for-  
dibus mundata purgataque, temperantiæ nitore illu-  
stretur.

## C A P. X V I I.

### *De Recusat. iudicum.*

**R**ecusari iudices tam ordinarii quam delegati ex  
justâ causâ possunt, ut lites sine suspitione tra-  
cten-



ſtentur *l. ib. C. de judicijs. ſi quis tamen temerè hoc intentet, & repulſam patiatur, arbitrariè punitur, imò infamià notatur, ſi ſuſpiciones aliquam labem judici adſpergant, ejuſque famam fugillent.* Recuſationes judicum iſdem ferè regulis juriſ conſtant, quibus reprobationes teſtium, exceptis gradibus conſanguinitatis & affinitatis, qui ad quartum uſque gradum incluſivè, putà ſobrinos, extenduntur, teſtes autem, excluſis tantum parentibus & liberis, in cauſis civilibus admittuntur.

Eadem hic ratio affinitatis, quæ conſanguinitatis eſt, niſi quod affinitatis non dentur gradus. *l. 4. §. 5. ff. de grad. & adfin.* Ita uxoris meæ conſobrinæ maritus, non eſt meus *affinis l. 4. §. 3. ff. eodem.* Extinguà quoque per mortem affinitas non reviviſcit; eas enim affinitates eſſe intelligimus quæ nunc ſunt, non quæ antè fuerunt inquit *I<sup>us</sup> in l. 3. ff. de poſtul.* contrarium tamen à curiâ noſtrâ per errorem ſæpius definitum memini.

Atque hic tractatus noſtri finis eſto; in quo boni judicis officium obiter & perfunctoriè delineaffe, & levi (quod ajunt) penicillo adumbraffe ſufficiat:

Faxit Deus Opt. Max. juſtitix & judiciorum ſtator ac vindex, ut ejuſmodi judices in ordinem ſenatorium adſciſcantur, qui pietate, juſtitiâ, & eruditione conſpicui, conſilia ſua ad divini nominis gloriam, Reip. ſalutem, & bonorum omnium commodum dirigant ac convertant. A M E N.



## Praxis Cancellariæ,

S I V E

## Canones Curiales.

Cum ASTERISCIS in margine,

Defuetudinem quorundam denotantibus.

*Senator Curia sit honestæ vitæ, I<sup>us</sup>. & Laureâ  
doctorali decoratus.*

*Senator Apostolicæ reformatæ religionis professor sit  
ac propugnator, aliàs non feratur.*

*Frisius, in promotione ad hunc ordinem, extraneo præ-  
feratur, si sit idoneus, sin minus, peregrinus assumatur.*

*Senatores decorè vestiantur, tales quoque moribus  
sefe ostendant.*

*Senator, totus suæ functioni incumbat, neque ex  
professo alijs negotijs, putà mercaturæ, aut politicis  
advocationibus sese immisceat, præterquam in causis  
proprijs, proximorum, & affinium, quibus etiam con-  
silio adesse non prohibetur.*

*In congressu senatus omnes Senatores simul conveniant.*

Ab-



*Absentes rationem absentiae reddant.* \*

*Qui diutius sine venia absuerit, stipendium ei suum detrahatur, & inter praesentes distribuatur.* \*

*Pluribus eodem tempore quam quatuor, venia absentiae non detur.* \*

*Consultationes conclave non egrediantur, qui secus faxit, reprehendatur:* \*

*In senatu ordine quisque suo consideat. Idem quoque in referendo & rogandis sententijs ordo servetur.* \*

*Quisquis causas sibi commissas maturè non expedit, ignavus habeatur.*

*Causae privilegiae, uti pauperum & miserabilium personarum praeceteris referantur.*

*Item Senatorum, remissionis ad ordinarium judicem, impugnationis formalium appellationis, attentatorum, spolijs, rerum corruptioni obnoxiarum, tertiae & quartae dilationis ad probandum, mandatorum pœnaliũ, petitionis alimentorum, liquidationis & executionis sententiarum, leg. diffamari, petitionis tutorum vel curatorum, missionis ex edicto Divi Hadriani in possessionem, novi operis nuntiationis, damni infecti, & simil.*

*Causae novissimè ad definitivam instructae, proximè terminentur.*



*Senatores ad vota singulorum sint attenti, nec sibi invicem obstrepant, impedian, aut interloquantur:*

*Senatores non ex arbitratu suo, & ex privatâ conscientiâ; sed secundum jus scriptum, leges, constitutiones & consuetudines Frisicæ jus dicant.*

*Singulis relationibus diffinitivarum Senatores ad minus octo, interlocutoriarum quatuor, supplicationum tres intersint.*

*In gravibus dubiisque causis plures, vel omnes adhibeantur:*

*Si votis & opinionibus discrepent, per plura concludatur, vel si hoc integrum videatur, causæ merita brevibus repetantur & discutiantur.*

*Singulares & obstinati, in opinionibus suis non audiantur.*

*Causa semel discussa, non amplius in disquisitionem vocetur, & si hoc contingat, brevitati studeatur.*

*Expense litis per primicerium ordinis Senatorij taxentur.*

*Idem quoque in liquidandis fructibus & usuris jus esto.*

*Commissarius audientiæ juridicæ supplicationes expediat.*

*In causis momentaneis, & quæ moram non patiuntur, de plano disponat.*

De



---

## De Procuratore Fisci.

*Procurator Fisci sit vir honestus, Christianæ reformatæ religionis antistes & vindex, Iure Consultus, & ad functionem suam probe exornandam aptus, habilis, ac idoneus.*

*Procurator Fisci ante alios omnes audiatur.*

*Solis causis fiscalibus vacet.*

*Advocatus Fisci procuratoris impediti munus obeat.*

*Procurator Fisci nulli litem intentet, aut questionem status moveat, nisi implorato prius Curie mandato.*

*Processus fiscales ex emolumentis & mulctis fiscalibus solvantur.*

*Ratio accepti & expensi in fiscalibus quotannis redatur.*

De



## De Graphiario Curiae.

**G**raphiarius ipse munus sibi demandatum sedulo observet, necessitate valetudinis non impeditus.

*In Cancellariâ sententias Curiae extendat, supplicationum decretis subscribat, literas Curiales concipiat, easque maturius expediat.*

*Graphiarius vota & sententias Senatorum accuratè consignet.*

*Tres libros seu prothocolla habeat: sententiarum, decretorum, & recessuum.*

*Senatorum absentiam annotet.*

*Actus judiciales per amanuensem in rotulâ exactè conscribi curet.*

*Prothocollum mox post finitam audientiam perspiciat.*

*Errata, quæ in concipiendis sententiarum dictis animadvertit, modestè judici significet.*

*Votis & sententiis Senatorum nequaquam obloquatur.*

Pe-



*Pecunia in Curiâ depositâ, cistâ includatur, & in archivo aservetur, quatuor clavibus aperienda; quarum una Commissario audientiæ juridicæ, altera primicerio ordinis senatorij, tertia Graphiario, & quarta administratori cancellariæ concedatur.*

## De Advocatis.

*Advocati sint Iuris Doctores.*

*In causis sibi commissis, Advocati simul & procuratoris partibus fungantur.*

*Advocati extrâ Curiam, coram subalternis subse-  
lijs non postulent, neve arbitratores sese præbeant.*

*Causas sibi concreditas absque consensu partium  
alijs non committant.*

*Pauperum controversias æquè diligenter ac divi-  
tum tractent.*

*Advocatus in judicio, aut caveat, aut de mandato  
sibi prospiciat.*

*Mandatum antè litis contestationem exhibeatur.*

*Ratihabitio antè conclusionem in causâ proferatur.*

F

Si



*Deprehensus in morâ, expensas litis de suo præstet.*

*Advocati & procuratores in audientiâ juridicâ sint attenti.*

*A jocos, garrulitate & dictarijs abstineant.*

*Advocati præfatis paucis, merita causarum scriptis comprehendant.*

*Advocatus alter alteri non obstrepat, nec sermonem interrumpat.*

*Antigraphi ex cancellariâ sumantur.*

*Pauperibus illi gratis dentur.*

*Advocati quæ in cancellariâ scribi jusserunt, ipsi luant.*

*Pecuniam cancellariæ debitam non retineant.*

*Advocati & procuratores, taxatione primi Senatoris contenti sint, aut si gravatos se putent, reauditionis remedium implorent.*

*Litigantes desuper non gravent.*

*De quotâ litis cum iis non paciscantur.*

*De*



*Indebitè accepta restituant.*

*Processus, non ex prolixitate, sed diligentia & labore metiantur, iisque honorarium inscribant.*

*Superfluum actuum nulla habeatur ratio.*

*Advocati in qualibet causa quid receperint, juxta taxationem, judici in schedâ ostendant.*

---

## De Secretario, Ingrossistis, & alijs juratis Cancel- lariæ personis.

*Secretarius & Ingrossistæ jussa graphiarj promptè exequantur.*

*Secretarius, processus, sententias definitivas, & interlocutorias diligenti curâ custodiat, easque actis inscribat.*

*Idem quoque in taxationibus ædificiorum rusticorum fiat.*



*Secretarius solis cancellariæ suppositis archivum intrare permittat.*

*Secretarius instrumenta originalia, in cancellariâ, solus authentica reddat.*

*Ingrossistæ gradatim promoveantur:*

*Acta sibi commissa in tempore expediant.*

*Processus, prærogativam habentes, antè alios omnes describant.*

*Astu dolivè emungendæ à partibus pecuniæ non utantur.*

*Accensus cancellariæ procurabit, ut fores in tempore aperiantur & occludantur, & ad omnia officia cancellariæ paratus sit.*

*Accensus cancellariæ senatorum jussa fideliter exequatur.*

*Consilij & relationum tempore conclave non ingrediatur.*

*Si quid ibi negotij habeat, supplicationes, vel quid aliud exhibiturus, pulset.*

*In audientiâ juridicâ silentium imperet, fores apert*  
tos



tos servet, producta excipiat, & Advocatis porrigat.

Nemo in nuncium curiæ assumatur, nisi sit probatæ fidei, & vitæ integræ.

Relationibus nunciorum fides adhibeatur.

Suis sumptibus negotiâ sibi commissâ expédiant, suisque expensis vivant.

Suas quisque relationes scribere calleat.

Nemo nunciorum se præbeat difficilem, quovis in suo ordine proficiscendi.

Expeditus ad iter sit nuncius, quem ordo contingit, neque projectionem suam ad diem unum, nisi ex gravi causâ, & permissu curiæ differat.

Proximus in ordine proficiscendi, in cancellariâ præsto sit.

Æqualitas & ordo in distribuendis citationibus servetur.

Nuncij moderati sint, etiamsi quæ immoderatiores, in exequendis negotijs ipsis contingant, modeste tamen respondeant.

Nuncij ordinariâ mercede ac salario sint contenti.



*Tabularij sive nuncij insinuationes suas ipsi personæ, si ad eam pateat aditus, ostendant & exhibeant. Alias ejusdem domesticis eas prælegant, & antigraphum tradant.*

*Insinuationum suarum fide dignam relationem faciant.*

*Executores sententiarum curialium, receptis literis executorialibus, ad domicilium victi & per sententiam condemnati se conferant, diligenter de eo inquirent, cujus si detur copia, literas supra scriptas ei porrigant, & ut sententiæ intrâ decendium satisfaciatur, insinuent.*

*Si copia ipsius personæ condemnatæ haberi nequeat, uxori vel alij ex familiâ, modo grandiori, præfatas literas, aut earum copiam tradant, cum mandato, ut quamprimum patrifamilias ostendantur.*

*Si nemo ex familiâ eas accipere velit, relinquent in domicilio & loco executionis, præsentē uno saltem de familiâ.*

*Si fores aperiantur, & nemo prodeat, convocato uno vel duobus vicinis, literas executoriales ædibus affigant.*

*Si aliquem domi esse, nec tamen aperire velle cognoverint, eas ostio, vel fenestræ, alijve loco annectant, atque ita recedant.*

*Re-*



*Relationem omnium exactam faciant.*

*Si adversus communitatem executoriales emanarint, duplicatas earum ejusdem communitatis curiæ, si qua sit, tradant, alioquin parochialis Ecclesiæ valvis, sive loco publico affigant.*

*Totius rei gestæ seriem relatione suâ complectantur.*

*Executione non ritè factâ, præter pœnam arbitram, eandem suis expensis resumant ac reiterent.*

*In cæteris functionis suæ partibus ac membris, ordinationem & statuta Frisiæ ad unguem observent.*



*Elen-*



# *Elenchus Caputum*

## H U J U S

## TRACTATUS.

<b>C</b> Ap. 1.	<i>De Etymologiâ Iudicis, &amp; variis ejusdem appellationibus.</i>	Fol. 1.
Cap. 2.	<i>De Definit. Iudic. sive ejus descript.</i>	2.
Cap. 3.	<i>De Officio seu vitâ Iudicis morali.</i>	3.
Cap. 4.	<i>De Officio Iudicis in genere circa lites.</i>	5.
Cap. 5.	<i>De Iurejurando Iudicum.</i>	9.
Cap. 6.	<i>De in jus vocando.</i>	10.
Cap. 7.	<i>De videndo ante interlocutor. processu.</i>	13.
Cap. 8.	<i>De juramento calumniæ, positionibus, &amp; articulis probatoriis.</i>	15.
Cap. 9.	<i>De Testibus examinandis.</i>	17.
Cap. 10.	<i>De Oculari inspectione.</i>	21.
Cap. 11.	<i>De Terminis Iudicii præfinito.</i>	22.
Cap. 12.	<i>De Sententiâ Definitivâ.</i>	23.
Cap. 13.	<i>De Executione Rei judicatæ.</i>	25.
Cap. 14.	<i>De Revisione.</i>	26.
Cap. 15.	<i>De Diplomatis moratoriis, Beneficio inventarii, &amp; Cessionis bonorum.</i>	28.
Cap. 16.	<i>De Officio Iudicis in causis Criminal.</i>	29.
Cap. 17.	<i>De Recusat. judicum.</i>	34.
	<i>Praxis Cancellariæ, sive Canones Curiales.</i>	36.

F I N I S.



# CALLISTRATUS,

*In l. 19. ff. de Off. Præsidis.*

**O**bservandum est jus reddenti, ut in adeundo quidem facilem se præbeat, sed contemni non patiat, unde mandatis adiicitur, ne præsides provinciarum in interiorem familiaritatem provinciales admittant. Nam ex conversatione æquali contemptio dignitatis nascitur. Sed & in cognoscendo neq; excandescere adversus eos, quos malos putat, neque precibus calamitosorum illacrymari oportet, id enim non est constantis & recti judicis, cujus animi motum vultus detegit: & summatim ita jus reddet, ut auctoritatem dignitatis, ingenio suo augeat.

---

*Errata, quæ per incuriam Typothetæ irreperunt, sic corrige.*

Pag. 4. *pro venerari, lege suspici.* Pag. 6. *pro fureis, lege fueris.* Pag. 21. *pro dubiatur: lege dubitatur.* Pag. 23. *pro exfluxerunt, lege effluxerunt.* Pag. 35. *pro ib. lege 14.*







